

W935.5.174

# M A R W N A D,

ER COFFADWRIAETH

AM Y DIWEDDAR

## BARCH. J. ROWLANDS,

GWEINIDOG YR EFENGYL

YN

NGHWMLLYNFELL A CHWMAMMAN,

Yr hwn a ymadawodd â'r fuchedd hon Mai 28ain,  
1834, yn 45 mlwydd oed.

GAN JOHN DAVIES,

YSTRADGURLAIS:

“Gwyn eu byd y meirw y rhai sydd yn marw yn yr Ar-  
glwydd.”---Dat. 14, 13.

MERTHYR:

ARGRAFFWYD GAN THOMAS PRICE.

1834.

X705 314561

Oddiar serch personol, yn nghyd â'r siarad  
parchus sydd gan yr eglwysi a'r ardalwyr yn  
gyffredin, y cyfansoddais yr ychydig bennillion  
canlynol. Gallaf ddywedyd yn debyg fel y dy-  
wedodd ein Harglwydd am y wraig hòno yn yr  
efengyl, "Yr hyn a allodd hon hi a'i gwnaeth."  
Er nad wyf fi a lle genyf i ganmol y gwaith, gallaf  
ddywedyd, Yr hyn a ellais a wnaethum.

Eich gostyngedig Was,

J. D.

## MARWNAD, &c.

---

1 PAN bwy'n sylu ac yn edrych  
Oddiamgylch ar bob llaw,  
Gwelai'r duwiol deulu'n dawel  
Yn ymadael yma a thraw;  
Angau, brenin dychryniadau,  
Yn eu cludo tua'r bedd,  
Mor ddiaffafr y gwrolion,  
A'r gwywedig gwael eu gwedd.

2 Yn ol cyngor dwyfol drefn,  
Doeth Greawdwr dae'r a nef,  
Dirgel bethau'n dod yn eglur,  
Fel maent yn ei arfaeth ef;  
Llywodraethu fel y myno,  
Mae yn mhlith holl ddynolryw,  
Dwyn i'r bedd a chodi fynu,  
Clwyfo, lladd, a chadw'n fyw.

3 Nid yw'n gofyn cyngor ungwr,  
P'odd y gweithia is y nen,

Ond yn ol ei lân ewyllys  
 Dwg ei feddwl oll i ben ;  
 Ac yn mhlith trigolion nefoedd,  
 Llywodraethu y mae ef ;  
 O am dewi a chael gwaeddi,  
 Gwneler ei ewyllys ef.

4 Fe ddanfonodd genad ffyddlon,  
 I hol Rowlands tua thre,  
 Angau nerthol, y gelyn olaf,  
 Dyna yw ei enw ef ;  
 Gwnaeth ei orchwyl mewn munudyn,  
 Rhoddodd iddo farwol glwy',  
 'Chawn mo'i weled mewn cymanfa,  
 Na chwrdd cwarter yma mwy.

5 Anwyl Rowlands, p'odd bu arnat,  
 Wrth wynebu'r dyffryn du ?  
 Pa dywyllwech ac anhrefn,  
 I'r truceiniaid yno sy ?  
 Pa fath feini sy'n'r afon,  
 Pa mor ddwfn ? Pa mor gry' ?  
 Yn mha ddull mae'r Archoffeiriad  
 Yno'n dofi grym y lli' ?

6 Mi ddych'mygraf gwelai'r Iesu  
 Yn yr afon yn dy gwrdd,  
 Yn dywedyd, Da was ffyddlon,  
 Gad i'r aeth i fyned fiwrdd ;  
 Tyr'd i mewn i'r pur lawenydd,  
 Mi bar'toais i ti le,  
 Gyda'r dyrfa a ddaeth allan  
 O'r cystuddiau tua thre'.

7 Beth yw'th olygiadau heddyw,  
 Anwyl Rowlands, dywed im' ?  
 Dywedaist yma yn odidog  
 Am rinweddau pen y bryn ;  
 Ond, pe cawn dy glywed heddyw,  
 Dywedit gyda newydd flas,  
 Am rym cariad y Messiah,  
 A rhinweddau dwyfol ras.

8 P'odd mae arnat yn y gwynfyd ?  
 Nid fel yma gyda ni ;  
 A oes cofio'r temtasiwnau  
 Gefaist ar y ddaear ddu ?  
 Yntau syllu ar newydd bethau,  
 Trefn iechydwrïaeth lawn,  
 A bwrcasodd Iesu'r Meichiai,  
 Ar Galfaria un prydnhawn.

9 Nid wyf eto yn nes o wybod,  
 Pwy sydd yna gyda thi,  
 A oes rhai fu'n anwyl genyt  
 Yma ar ein daear ni ?  
 B'le mae Evans draw o Raiadr,  
 Hammerton o Newton fwyn ?  
 Fu'n ddiweddar ar y ddaear,  
 Y newyddion da yn ddwyn.

10 A oes yna un gyfeillach ?  
 A ddywedaist fel y bu  
 Yn Nghwmllynfell, wythnos gyfan,  
 Cyn it ado'n daear ni ?  
 Am y felus wledd a gawsom,  
 Mewn Cymanfa ar ein taith,

Cyn it orphen dy ddiwrnod,  
A myn'd adre' ddiwrth dy waith.

11 Ond er meddu cymanfaoedd,  
A rhinweddau crefydd Crist,  
Ar ol bod ar ben y mynydd,  
Wylo yn y dyffryn trist ;  
Cymysgyd yw, ar y goreu,  
Yma ar ein daear ni,  
Ond cyflawnder o lawenydd  
Yw hi yna gyda chwi.

12 Fe fu'n enwog ar y ddaear,  
Can's tywysog oedd efe,  
Arweinydd tirion teulu Israel,  
O'r anjalwch tua thre ;  
Fe ddangosai'r llwybr uniawn,  
Ac fe dystiolaethai ma's,  
Nad oes ffordd i gadw enaid,  
Ond trwy haeddiant Crist a'i ras.

14 Fe fu yn y weinidogaeth  
Dros dri phump a thair yn llawn,  
O flynyddau yn cyhoeddi  
'R iechydwrriaeth fawr ei dawn ;  
Hyd nes daeth yr awr benodwyd  
Yn y tragwyddoldeb maith,  
Megys milwr wedi concro,  
Fe aeth adre' i ben ei daith.

14 Ffarwel, ffarwel, Rowlands, bellach,  
Ni ddychweli mwy yn ol,

Ond 'mhen 'chydig bach o ddyddiau  
 Ni ganlynwn ar dy ol;  
 Pridd i'r pridd a gaiff ei roddi,  
 'R ysbryd at yr hwn a'i rhodd,  
 Hyd nes bloeddio yr archangel,  
 Yno cawn ein barn ar go'dd.

15 Ac os byddwn fyr o bwysau,  
 Yn y glorian ddydd a ddaw,  
 Ar ol gwrandio y'Nghwmllynfell,  
 A'r gym'dogaeth yma a thraw,  
 Cawn ein gyru mewn digofaint,  
 Llid tragwyddol fydd ein lle,  
 Am in' wrthod iechydwrïaeth,  
 A dirmygu ei eiriau e.

16 Mrs. Rowlands, yn eich galar,  
 Trowch eich golwg tua'r nef,  
 At yr hwn sy'n gwrandio gweddi,  
 Ac a glyw riddfanllyd lef,  
 Na alerwch fel heb obaith,  
 Cael ail-gwrddydd yn y man,  
 Gyda'r Iesu mewn gogoniant,  
 Mi obeithia, fydd eich rhan.

17 A Chwmamman a Chwmllynfell,  
 Ei ddwy eglwys barchus iawn,  
 Llefuch lawer tua'r nefoedd,  
 Am i'r Arglwydd mawr ei ddawn,  
 Anfon gweithiwr idd ei winllan  
 Gadwo'r llafur yn ei le;

Ysbryd cariad a'ch rheolo,  
Nes eich myned draw i dre.

- 18 Rho'f ofyniad wrth ddybenu,  
A oes drygfyd yn nesâu,  
Gan fod Llywydd mawr y bydoedd  
'N cym'ryd ato'r duwiol rai?  
A yw'r Ior yn ddig wrth Gymru,  
Am ein beiau aml ri?  
Llefwn am gael cuddio'n penau  
O fewn clwyfau'r Iesu cu.

**DIWEDD.**